

## **Weckherlin, Georg Rodolf: Venus an das Frawen Zimmer (1641)**

- 1 Prin cessin/ gleichloß an gestalt/
- 2 Vermehrend meines Sohns gewalt/
- 3 Jhr deren haar/ stirn vnd augbrawen
- 4 (darunder himmelische blick
- 5 Entdöcken aller hertzen glick)
- 6 Wie Triumbogen anzuschawen.
  
- 7 Jhr/ deren schönheit/ ehr vnd zucht
- 8 Ist nu mein trost/ schutz vnd zuflucht
- 9 (weil niemand Euch kan widerstreben)
- 10 Zu Euch kom ich mit meinem Sohn/
- 11 Euch vnsern Apfel/ Scepter/ Cron
- 12 Vnd Schönheit selbs zu vbergeben.
  
- 13 Dan ja ein jede vnder euch/
- 14 So götlich schön/ so weiß/ so reich/
- 15 Den güldin Apfel kan begehren:
- 16 Ich/ Juno vnd Pallas zu mahl
- 17 Schamroht ab dem streit vnsrer wahl
- 18 Euch alle nu mehr billich ehren.
  
- 19 Darumb jhr Nymfen keusch vnd rein/
- 20 Jhr deren hertz-leuchtender schein
- 21 Kan alle hertzen bald enttrüben/
- 22 Vermehret mein vnd ewer lob/
- 23 Vnd fahret fort mit süsser prob
- 24 Keusch vnd beständiglich zu lieben.
  
- 25 Jhr/ deren augen klarer preiß
- 26 Den sehlen pfleget jhre speyß
- 27 Mit lieb zu nemen vnd zu geben/
- 28 Verkündet/ daß das gröste layd
- 29 Verkehret sich durch lieb in frayd

- 30 Vnd das recht lieben ist recht leben.
- 31 Jhr/ deren hertzen noch gantz frey
- 32 Mit vnversprochner freyer trew
- 33 Sich hin vnd widerfliegend vben;
- 34 Wisset daß alle frewd vmbsunst/
- 35 Wa man nicht hat der Liebe gunst/
- 36 Vnd das wol leben ist wol lieben.

(Textopus: Venus an das Frawen Zimmer. Abgerufen am 23.01.2026 von <https://www.textopus.de/poems/19008>)